

04 December. 2025

समे .18:15 Hrs

<><><><><><>

Headlines

- मुखमंत्री उमर अब्दुल्ला होर अज्ज श्रीनगर च अग्रिवीरें दे 6में बैच दी पासिंग आउट परेड च शामिल होए, जम्मू-कश्मीर लाइट इन्फेंट्री गी जम्मू-कश्मीर दे लोकें लेई दलेरी ते बलिदान दा प्रतीक दस्सेआ।
- सरकारै एस.आर.ओ-43 दा नां बदलियै रिहैबिलिटेशन असिस्टेंस स्कीम रक्खेआ ऐ।
- नौसेना दिएं उपलब्धिएं ते भूमिका गी उजागर करदे होई भारत अज्ज नौसेना दिवस मना'रदा ऐ, उपराज्यपाल मनोज सिन्हा होरें शुभकामनां दित्तियां।
- जम्मू-कश्मीर च पिछले 5एं बरें दरान 50 ज्हार अयोग्य राशन कार्ड रद्द करी दित्ते ना।
- थन्नामंडी पुलस स्टेशन गी गृह मंत्रालय दे सर्वे च जम्मू-कश्मीर दा बेहतरीन "पुलस थाना" घोशत कीता गेआ ऐ।

CM-JKLI

मुखमंत्री उमर अब्दुल्ला होरें अज्ज जम्मू-कश्मीर लाइट इन्फेंट्री रेजीमेंटल सेंटर श्रीनगर च अग्रिवीरें दे 6में बैच दी पासिंग आउट परेड च हिस्सा लैता। उनें अग्रिवीरें गी ट्रेनिंग पूरी करने पर ममारकबाद दित्ती ते देश दी सेवा करने लेई उन्दे कामयाब भविष्य लेई शुभकामनां दित्तियां। उमर अब्दुल्ला होरें अग्रिवीरें दी भूमिका दी सराहना करदे होई जम्मू-कश्मीर लाइट इन्फेंट्री सिखलाई केंद्र दे महत्व गी बी उजागर कीता। उनें आखेआ कि जम्मू-कश्मीर लाइट इन्फेंट्री रेजिमेंट जम्मू-कश्मीर दे लोकें लेई दलेरी ते बलिदान दी प्रतीक रेही ऐ ते कश्मीर घाटी च बड़े मते चुनौतीपूर्ण दौर च बी जम्मू लाइट इन्फेंट्री दा योगदान मता महत्वपूर्ण रेहा ऐ। मुखमंत्री होरें सेना च नमें शामिल अग्रिवीरें गी शुभकामनां दित्तियां ते मगरा पत्रकारें कन्नै गल्ल करदे होई उमर अब्दुल्ला होरें आखेआ

<><><><><><>

CM-SRO

मुखमंत्री उमर अब्दुल्ला होरें घोशणा कीती ऐ जे सरकार नै एस.आर.ओ-43 गी रिहैबिलिटेशन असिस्टेंस स्कीम R.A.S नांS दितता ऐ ते आखेआ जे इस स्कीम तैहत कश्मीर प्रांतै लेई हुक्म जारी करी दित्ते गेदे न ते अजें तोड़ी 60 नियुक्ति पत्र बंडे बी जाई चुके दे ना। पत्रकारें कन्नै इस बारै गल्ल करदे होई मुखमंत्री होरें यकीन दोआया कि R.A.S स्कीम तैहत जेकर कुसै सरकारी मलाजम दी अपनी नौकरी दरान मौत होई जंदी ऐ तां ओहदे परिवार दे इक जीS गी सरकारी नौकरी दित्ती जाह्ग। मुख्य भरै च राजभवनें दा नांS बदलियै लोकभवन रखने पर

प्रतिक्रिया दिंदे होई मुखमंत्री हारें आखेआ जे लोकें गी शासन किस चाल्ली कम्म करदा ऐ, ओह्दी चिंता ऐ ते संस्थानें या ईमारतें दा नांऽ केहू ऐ ओह्दे नै आम जनता दा कोई सरोकार नेई ऐ। उनें आखेआ

<><><><><><>

Navy-Day

नौसेना दिवस अज्ज पूरे देश च मनाया जा'रदा ऐ। 4 दिसंबर गी हर ब'रे नौसेना दिवस भारती नौसेना दी भूमिका ते उपलब्धिं गी उजागर करदे होई मनाया जंदा ऐ। 1971 च इससै दिन आप्रेशन ट्राइडेंट दरान भारती नौसेना नै 4 पाकिस्तानी समुंद्री बेडे तबाह करी दित्ते हे जिंदे च पी.एन.एस खैबर बी शामिल हा। उपराज्यपाल मनोज सिन्हा होरें नौसेना दिवस दी सभनें गी बधाई दिती ऐ। इक सोशल मीडिया पोस्ट च उपराज्यपाल होरें सारे कर्मिं ते उन्दे परिवारें गी मुबारकबाद दिती ऐ। देश दी समुंद्री सीमा दी हिफाजत, सुरक्षा पक्की ते मनुक्ख मिशनें च योगदान दे रूप च नौसेना दी सेवा काबिले तरीफ ऐ। उंदी हिम्मत, पेशेवर रूख ते निस्वार्थ सेवां गी सलाम ऐ।

<><><><><><>

Immunization Day

सेहत ते मेडिकल शिक्षा मेहकमे दे सचिव डॉ. सैयद आबिद रशीद होरें 21 दिसंबर गी आयोजित कीते जाने आहले राश्ट्री टीकाकरण दिवस, पल्स पोलियो टीकाकरण-2025 गितै तयारिं दा जायजा लैने ते इ'नेंगी मुकदा रूप देने लेई अज्ज टीकाकरण बारै प्रदेश कार्जबल दी मीटिंग दी अध्यक्षता कीती। मीटिंग च जानकारी दिती गेई जे 21 तरीक गी टीकाकरण अभियान दे बाद 22 ते 23 दिसंबर गी घर-घर जाइयै बी इस गल्लै गी यकीनी बनाया जाह्ग जे 5एं ब'रें तोड़ी दी उम्री दा इक बी न्याणा पोलियो कोला बचाऽ आह्लियां बूदां पलेयाने कोला खुंजी नेई जा। मीटिंगै च दस्सेआ गेआ जे भारत नै पोलियोमुक्त आह्ला दर्जा हासल करी लैते दा ऐ ते इत्थै पोलियो दा आखरी मामला 13 जनवरी 2011 च सामने आया हा ते ओह्दे बाद मार्च 2014 च इसी पोलियो कोला मुक्त होने दा प्रमाण पत्र दित्ता गेआ हा। सेहत सचिव होरें पोलियो मुक्त घोशित होई जाने दे बावजूद बी पूरी चाल्ली सौहगा ते सतर्क रौहने पर जोर दित्ता।

<><><><><><>

Street Play

जम्मू नगर निगम आसेआ शुरू कीती गेदी "वाल ऑफ शेम" पैहलकदमी तैह्त्त अज्ज रिहाड़ी कालोनी दे वार्ड नंबर 25 च इक नुक्कड़ नाटक पेश कीता गेआ जिसी दिक्खने लेई स्कूली बच्चें, टीचर, मकामी बसनीक ते होर लोक मते चाएं-चाएं किट्टे होए दे हे। नटरंग दे कलाकारें आसेआ खेढे गेदे इस नुक्कड़ नाटक राएं लोकें गी सफाई-सुथराई बनाई रखने, खुल्ले च पेशाब नेई फिरने, कुदरै बी कूड़ा-कचरा नेई सुट्टने ते इक जिम्मेदार नागरिक आडर बवहार करने लेई जागरूक कीता गेआ ते एहू सनेआ सभनें तगर पुजाने लेई उ'नेंगी प्रेरित बी कीता गेआ। नाटक राएं एहू संदेश दित्ता गेआ जे अपने आले-दोआले सफाई-सुथराई बनाई रखना सारें दी सांझी जिम्मेवारी ऐ। पत्रकारें कन्नै इस बारै गल्ल करदे होई जम्मू नगर-निगम च सेहत अधिकारी विनोद शर्मा होरें आखेआ



Ration Cards Deleted

जम्मू-कश्मीर च पिछले 5एं बरें दरान प्रधानमंत्री गरीब कल्याण अन्न योजना तैहत लाभार्थियों दी जांच तस्दीक आहले राष्ट्रव्यापी अभियान दरान कोई 50 ज्हार राशन कार्ड रद्द कीते गे न। अज्ज लोकसभा च केंद्र सरकार दी तरफा जानकारी दिती गई जे जम्मू-कश्मीर नै 2021 च 33 ज्हार 677, 2022 च 2 ज्हार 927, 2023 च 5 ज्हार 403, 2024 च 4 ज्हार 767 ते 2025 च अजें तोड़ी 3 ज्हार 36 राशन कार्ड इस स्कीम तैहत रद्द कीते न जिंदी कुल गिनतरी 49 ज्हार 810 बनदी ऐ। उपभोक्ता मामलें, खुराक ते सार्वजनिक बंड बिक्री सरबन्धी मंत्रालय नै जानकारी दिती ऐ जे पूरी जांच ते तफतीश दे बाद गै जाली ते अयोग्य लोकें दे राशन कार्ड रद्द कीते गे न।



Thannamandi-Best PS

राजौरी जिले लेई एह इक्क बड़ी गै मानै आहली गल्ल ऐ कि एहदे “थन्ना मंडी” आहले पुलस थाने गी जम्मू-कश्मीर दा बेहतरीन थाना घोशित कीता गेआ ऐ। भारत सरकार दे गृह मंत्रालय आसेआ कीते गेदे इक प्रतिष्ठित सर्वे च एह थाना मुल्ये दे बेहतरीन थानें च 14में नम्बरै पर आया ऐ। इस उपलब्धि च पुलसै दी जिम्मेदारी बेहतरी ढंगै नै निभाना, कुशल सेवा उपलब्ध कराना ते लोकें कन्नै पुलसै दा खरा बवहार जनेहियां विशेषतां शामिल न। इस सरबन्धे च च अपराधें गी रोकने, शकैतें दा नबेड़ा करने, लोकें दी पुज्ज, ढांचागत विकास, तुरत प्रतिक्रिया ते लोकें दी संतुष्टि जनेए मानक सर्वेक्षण च रक्खे गेदे हे जिंदी बिनाह पर “थन्नामंडी” पुलस थाने गी एह थाहर हासल होई ऐ।



Cleaniness Drive

स्वच्छता ही सेवा-2025 मुहिम दे सरबन्धे च 137 बटालियन सी.आर.पी.एफ नै जीएमसी उधमपुर परिसर च बड्डे पैमाने पर सफाई अभियान चलाया। इस अभियान दी अगुवाही डिप्टी कमांडेंट करतार चंद होरें कीती ते 137 सी.आर.पी.एफ बटालियन दे 50 कर्मियें, अधिकारिएं ते जीएमसी उधमपुर दे सफाई मित्रें एहदे च हिस्सा लैता। इस सफाई अभियान दा मार्गदर्शन कमांडेंट सी.आर.पी.एफ 137 बटायिन मनोज कुमार सिकोन होरें कीती। सी.आर.पी.एफ कर्मिएं जीएमसी दे आले-दोआले आहले क्षेत्र गी साफ कीता, खास करिए ब्लड बैंक परिसर गी। आकाशवाणी समाचार कन्नै गल्ल करदे होई डिप्टी कमांडेंट होरें आखेआ



Karkhandar Scheme Ramban

रामबन जिले च हत्थखड्डी ते दस्तकारी विभाग कारखानदार स्कीम दे तैहत प्रशिक्षण पर खास ध्यान देआ'रदा ऐ जेदे कन्नै नमी तकनीकें दी जानकारी हासल करिए कारीगरें गी आमदनी च इजाफा होई सकै। इस स्कीम दे तैहत कारखानदारें ते सखेत्रुएं गी माली मदाद बी दित्ती जंदी ऐ। कारखानदारें गी हर प्रशिक्षण बैच स्हाबै इकमुश्त 25 ज्हार रपे दित्ते जंदे न जेदे कन्नै उपकरणें, कच्चे माल, जगह बगैरा दे खर्चे पूरे कीते जंदे न। हर सखेत्रु गी हर म्हीने 2 ज्हार रपे बी दित्ते जंदे न। इस स्कीम बारै मती जानकारी दिंदे होई हत्थखड्डी ते दस्तकारी विभाग रामबन दे सहायक निदेशक प्रदीप शान होरें आखेआ

<><><><><><>

WSHGs Training Prog.

ग्राएं च आजीविका यानि रोजी-रूट्टी कमाने दे साधने गी बढाने ते महिलाएं दी भागीदारी कन्नै राई-बाई सरबंधी उद्यमता दे विकास दे मकसद कन्नै डी.सी किश्तवाड़ पंकज शर्मा होरें 1 ध्याड़े दी राज्य दे अंदर प्रशिक्षण कार्यक्रम दा शुभारम्भ कीता जेदे च महिलाएं दे स्वयं सहायता समूहें दी मशरूम दी खेती दा प्रशिक्षण दित्ता जाह्ग। एच.ए.डी.पी परियोजना 10 दे तैहत इस कार्यक्रम दा सरिस्ता राई-बाई विभाग किश्तवाड़ तरफा कीता गेआ। इस प्रशिक्षण कार्यक्रम दा मकसद महिला स्वयं सहायता समूहें दा कौशल विकास, टिकाऊ आमदनी दे जरिए उपलब्ध करवाना ते खुम्बें दी खेती गी बढावा देना जेदे कन्नै जिले च मुनाफे आहली राई-बाई च बाद्दा होग।

<><><><><><>